

# Klochsterräbe-Schränzer

---

## 1000 und ai Freye Stross-Nacht

Motto:

*s'isch nyt meh mit: «us aigem Bode»,  
orientalisch isch jetz Mode!  
Mit fuulem Zauber und mit Märli  
Wit rych und rycher dr dimmscht Kärli!*

D'Freiestross, es isch e Fluech  
die gnagt jetz bald am Hungertuech.  
Voll Schräge sehn die Ladefritze  
scho uff em Dach dr Gaier sitze.  
Si sueche drum, was hesch, was gisch,  
wo do en Uswäg z'finde-n isch.  
Und ain, wo d'Wärbedrummle schränkgt,  
het pletzlich an d'Regierig dänggt.  
Die gienge, wenn si Pulver welle,  
em Volgg als Märli go verzelle.  
Doch sinn fir d'Basler ender schlimm  
die dytsche vo de Brieder Grimm.  
Und so erläbsch in stolzer Pracht  
aitausig und ai Basler Nacht.

Am Afang z'overscht an dr Freye  
stoht jetz e Glaspalast, e neye,  
wo d'Raiber ihri Schetz dien horte –  
s'het au no andri vo där Sorte –  
Dr Ali Schaller kennt emole  
Dert obe syni Stitz go hole.

Und undedra zer lingge Hand  
Het ain e Tirggehönigstand.  
De findisch uf syne Ladetisch  
Alles, was siess und gläbrig isch.  
Drum haig dr Zschogge ihn syt Johre  
Zeum Hus- und Hoflifrant erkore.

Orientalisch – gosch fascht druff –  
Stygt vis-à-vis e Grichli uff.  
Dert kennt als Schaich vom Gsundhaitswäse  
Dr Miescher Aladin verläse,  
was fir e Sorte vome Duft  
am beschte dät dr Basler Luft.

Mer wän jetz wyter abe laufe,  
bym Basar Pfau e Teppig kaufe,  
wo fliegend, sicher, schnäll und guet,  
was me nimm brucht, entfiehre duet.  
Dä hätte mer – so hämmers dänggt –  
sinnigerwys em Wulli gschhänggt.

Und uf dr andre Syte-n-äne  
bikämt dr glai Mugg Fraideträne.  
Denn är, wo doch so schnäll ka laufe,  
kennt dert Zauberpantoffle kaufe.  
Als Tennisstar der Egge-n-Ab.  
Git drzue Autogrämmli ab.

S'Spylwaregschäft vom F.C. We  
Het undedra e Glanzidee.  
Es zaigt in orientalisch'schem Stil  
das ney Ost-West-Tangäntespil.  
Drzue do kenni als Expärte  
Dr Sindbad Huser b'ruefe wärde.

Ganz mied vom luege-n-und vom kaufe,  
so kunnsch am Schluss in Schlüssel z'laufe.  
Dert duet dr Kalyf Wyss regiere,  
loht Poulet Vogel Rock serviere  
und zaigt e jedem, wo's gärn wisst,  
wie Röschti me uf tirgisch isst.

---

Dä Märliplausch bringgt, Gopfridsteggli,  
e ganz e Huffe Glotz ins Seggli  
vo unserer Freye. Ibers Johr  
kunnt jede sich als Nabob vor  
und mit däm vyle Gäld im Hus  
do baut me uf und a und us,  
so dass – i miechti fast e Wett –  
s'in fuffzig Johr no Aengpäss het,  
und unsri Glygge mien no lang  
go iebe an däm Slalomhang.

---

Tausig und ai Ladärne kasch am Fasnachtszyschtig  
in dr Kongrässhalle gseh.  
S'isch off vo de morge-n-am nyini bis z'obe-n-am elfi.

---